

四庫全書

集部

欽定四庫全書

兩宋名賢小集卷三百七十四

宋 陳 思 編

元 陳世隆 補

棣華館小集

楊甲字鼎卿重慶昌州人大觀時遊京師頗有聲望  
嘗仕於蜀旋以事去官寓居靈泉山中有棣華館小

集一卷

出東郭見山

二年不見山見之喜不休舉手三揖之山遠不頷頭疑  
我墮塵土已與俗同儔稍稍望雲脚下見八九丘近前  
與之笑顏色漸和柔迎我以松風與我相獻醜憐我不  
識路導以溪流豈其終愛余為此世所仇一官最下  
策包裹辱與羞百年在平地亦有一日憂誰能無饑渴  
往與青山謀

合江汎舟

莫踏街頭塵寧飲城東水江頭汎船去葦間問漁子岸  
深魚有家鳧鴈在中止得酒可以歌得樹可以樣年年  
舟中客顏色不相似風波無前期遊者亦如此短篙醉  
時策遠山卧後几老我不耐醒日落西風起

遊長松寺宿石門僧舍得露字

疾風吹輕衣駕我雲脊路人間一回首驚絕不敢顧鳥  
投虛無底森森不知處蜂窠螿丘垤與世同所驚試看  
一蒼茫誰有不平慮尚憐野僧屋佛面荒苔蠹斷崖劃

呀吻洶洶水石怒我來得竒觀拄杖叩巖樹青山有驕  
色斯客不能句平生二三子慰我一相遇娟娟松間月  
幽絕亦可度夜闌更小語風逼遺響去酌君無多酒繼  
以木蘭露

宿安靜觀

青山轉龍脊矯首西南天上有仙人祠臺殿飛後前下  
見雲雨興樹色暗平川仙人兩黃鵠乍去無歸年向來  
道上履人著幾何錢一朝聞羽化悵望空流涎却揮囊

中金瓦礫來投捐巖巖化金碧香火通雲煙人間萬事  
爾旦暮有愚賢而况爭奪場轉手分媿妍仙人一回首  
破壠與荒阡紛紛不足道哀此區中緣石泉瀉幽潔意  
寂不肯喧夜聞松風涼起坐心寥然

與客遊滄浪亭

霧回林蒼黃漲落水寒碧西郊好風景曉霽千里色相  
從二三子埽灑溪上石主人信愛客沽酒炊玉粒揮觴  
一再行弄此竹間日跳波醉中舞野唱寒外急牛羊歸

匆匆見雁來一一頽然寄天放不受世褊迫永懷堂中  
翁回首千歲跡豈無獨往願乃為饑凍逼霜空洞庭野  
天濶雲夢澤欲窮扶桑枝尚挂滄澥席何當從茲去且  
暮生羽翼

靈泉道中

荒鷄不知林落日明鴉背山行曲折盡稍出喬木外前  
峰近相向秃缺不可蓋泉石微斷續渚澤亦多派牛羊  
深墟落稚子翳蓬艾稻秧碧剡剡遮隴無疆界今年田

大有飽飯我亦快猶慙食無功舉箸再三餽何當磨腰  
鑣助爾芟稊稗

寒食遊學射山

疾風吹沙天茫茫日落未落原野黃山空無人石碌碌  
路長馬饑石齧足荒臺古林翳雲族何人刻崑縛層屋  
當時萬騎填山谷至今拾寶多遺鏃故園山川愁遠目  
人世悲歡風雨速凌高舉酒天為感手攀崑樹叩雲木  
何人唱我淒涼曲興亡一眼冥冥綠埜水平蕪飛鴈驚



臘日遊梅壑得樹字

年年看梅水西路白頭溪翁眼如故  
重來攀髯老不死我亦風埃憶歸去  
酒酣百恠入我腸夜半恍惚與龍遇  
醉騎一尾天上歸陳迹江頭不知處  
梅花勸汝一杯酒千歲寒凝真旦暮  
欲將老大傲風雪穴蟻窠蟲已無數  
成都萬事更竒古石笋猶疑卿相墓  
孔明廟前柏千尺神物脩脩泣幽樹  
它時滅壞亦同歸人生誰能一長顧

庚寅再遊

霜郊馬頭鞭影西欲尋遠梅無舊蹊但聞艸木皆有香  
未到已識花前谿艤舟登岸入梅處竹樹烟靄茆茨低  
百年死樹蟲蘚暗鱗甲漠漠僵橫霓老翁鼻祖頭雪白  
下見兒女方勝筭數株無力已仆地強起放春花滿畦  
瘦龍夭矯欲仙去脊尾一半埋沙泥雷公幾時獵幽蟄  
夜半刀斧來剗剗野人往往多再拜疑有鬼物憑其栖  
問樵訪牧不知歲齧齧已見今旄倪故人同遊六七輩  
或似醉阮林中嵇繞樹覓花不識路東邊犬吠西號鷄

楫中但有酒清濁寒具野擔勤提携誰言猶是蜀梅苑  
破丘斷壠山蒿藜種花滿地作痴計隨手變化空塵壑  
只餘老樹香不滅力戰風雨猶堅屨何時江村一曲路  
與子共賦歸來兮

靈泉山中

小縣相籠合濛濛數百家果蔬爭晚市樵牧亂晴沙落  
日平江迴青山細路賒偶居無事在隨意問桑麻  
野色山圍盡風煙更可憐客情牛鐸外農事藕花前聚

汲松根井寬愁石底泉寧須計升斗詩興亦超然

勝地仙靈宅微官也謫居焚香他日夢隱几向來書小  
睡便山雨長齋稱野蔬逢人問無恙滿意說樵漁

日下溪林薄芊芊肅晚暉閉門成石隱小水亦生肥醉  
著谿藤杖歸來木葉衣狂歌有虎兕吾道只應非

何處長松寺雨花雲外臺山從百曲轉路入九闕回老  
檜成龍盡殘柯借鶴來人間斤斧亂風壑夜聲哀

靈泉山上晚望

野曠樹還亂林深烟更微天隨殘日盡雲掣斷山飛玉  
壘風烟濶秦城艸木非憑高無限事今夜客沾衣


遠目昏難盡青山濶展圍眼花隨處亂雲樹一時飛秋  
至客愁遠路難心事違更憐人北望不見鴈南歸

登待鶴亭

橫峯亂嶺如奔蛇前者欲起後驅呵危亭獨立一回首  
天罅雲隙皆收羅手攀落日意不盡目送孤鴻愁更多  
秋風衣裳客未冷我欲飲酒君當何

謁朱真人祠

一濯巖下溪再拜巖中庭清風肅然來吹我衣上腥仙人芙蓉冠乘月下雲駟山空雜珮響靜夜朝百靈寂寥古壇外但見斗與星青山無行跡霧雨空冥冥



兩宋名賢小集卷三百七十四

欽定四庫全書

集部

兩宋名賢小集卷三百

七十五至  
八十五

詳校官中書臣 閔思毅

助教臣 常循覆勘

總校官編修臣 王燕緒

校對官編修臣 王天祿

謄錄監生臣 徐泰吉



欽定四庫全書

兩宋名賢小集卷三百七十五

宋 陳思 編

元 陳世隆 補

葵齋集

趙孟堅字子固海鹽人宋宗室也寶慶初登進士第  
入元隱居不仕兄子昂嘗往候之登堂良久絕不與  
見既去急呼童取水洗其坐處其為人孤介如此書

畫亦大有名

里中康節庵畫墨梅求詩因述本末以示之

逃禪祖花光得其韻度之清麗節庵紹逃禪得其蕭散  
之布置回觀玉面而鼠鬚已見工夫較精緻雙枝倒作  
鹿角曲生意由來端若爾所傳正統諒未絕捨此的傳  
皆偽耳僧花工之工則麤夢良意到工則未女中却有  
鮑夫人能守師繩不輕墜可憐聞名不識面云有江西  
陸公濟季衡麤醜惡拙祖弊到雪蓬濫觴矣所恨二王

無巨法多少東鄰擬西子是中有趣豈不傳要以眼力  
求其旨踢鬚正七萼則三點眼名椒梢鼠尾枝分三疊  
墨濃淡花有正背多般蕊夫君固已悟筌蹄重說偈言  
吾亦贅誰家屏障得君畫更以吾詩跋其底

康不領此詩又有許梅谷者仍求再賦長律

濃寫花枝淡寫梢鱗皴老幹墨微焦筆頭三踢攢成瓣  
珠暈一圓工點椒粧綴蜂鬚擬笑靨穩拖鼠尾施長條  
盡吹花側風初急猶帶枝頭雪未消松竹襯時明掩映

水波浮處見飄颻黃昏時候朦朧月清淺溪山長短橋  
閨裏相挨如有意靜中背立似無聊筆端的皚明非畫  
軸上縱橫不是描頓覺坐來春盎盎因思行過雨瀟瀟  
從頭總是湯楊法拚下工夫豈一朝

王翠巖寫竹求詩

古畫畫物無定形隨物賦形皆逼真其次祖述有師繩  
如印印泥隨前人尚疑屋下重作屋參以新意意乃足  
晉魏而來幾百年義獻斷絃誰解續何況高束李杜編

江湖競賣新詩讀，願君種取渭川一千畝。  
飽飯逍遙步，捫腹風晴烟雨盡入君心胸。  
吐出毫端自森肅。

題水仙

自欣分得楸山色，地近錢塘易買花。  
堆案文書雖鞅掌，簪瓶金玉且奢華。  
酒邊已愛香風度，燭下猶憐舞影斜。  
簪弟梅兄來次第，挽春熱鬧令君家。

夜泊法忍寺

秋泊禪扉夜清吟，入興頻風生水鱗。  
甲雲放月精神禪。

有機鋒祕詩無句法新舊題尋不見吹遍壁間塵

題墨蘭圖

六月衡湘暑氣蒸幽香一噴冰人清曾將移入浙西種  
一歲纔華一兩莖

兩宋名賢小集卷三百七十五

欽定四庫全書

兩宋名賢小集卷三百七十六

宋 陳 思 編

元 陳世隆 補

翠寒集

宋无字子虚舊以晞顏字行名世家於晉陵以兵  
亂遷吳冒朱姓至元辛巳其父國珍領征東萬戶案  
牘適病痿无丐以身代許之入海抵竹島風電交作

隨驚濤上下經高麗諸山罹沈疴瘦骨柴立未嘗廢  
吟咏歲丁亥中丞王西溪舉茂才以奉親辭子虛初  
侍親西江從歐陽吳齋學壯歲負氣視富貴漠然卒  
年八十有一至正庚辰歲也馮海粟與知最晚一見  
其翠寒集亟序而鈇之

烏夜啼

露華洗天天墮水燭光燒雲半空紫西施夜醉芙蓉洲  
金絲玉簧咽清秋鼙鼓鞭月行春雷洞房花夢酣不迴



宮中夜夜啼  
栖鳥美人日日歌  
吳歛吳王國  
破歌聲絕  
鬼火青熒生  
碧血千年壞  
塚耕狐兔  
鳥銜紙錢掛枯樹  
髑髏無語滿眼泥  
曾見吳王歌舞時  
烏夜啼啼為誰身  
前歡樂身後悲  
空留瑟怨傳相思  
烏夜啼啼別離

自君之出矣

自君之出矣  
妾不出閨門  
懷君不敢恨  
惟有感君恩

又

自君之出矣  
妾自奉尊璋  
知君不思妾  
亦當思故鄉

公無渡河

九龍爭珠戰淵底  
洪濤萬丈涌山起  
鱷魚張口奮靈齒  
含沙射人毒如矢  
寧登高山莫涉水  
公無渡河公不可  
止  
河伯娶婦蛟龍宅  
公無白璧獻河伯  
恐公身為泣珠  
客公無渡河公不  
然憂公老命沈黃  
泉公沈黃泉公勿  
怨天

戰城南

漢兵鏖戰城南窟  
雪深馬僵漢城沒  
凍指控絃指斷折

寒膚著鐵膚，戰裂軍中七日不火食。手劍揮入吞熱血，  
漢懸千金購首級。將士銜枚夜深入，天愁地黑聲啾啾。  
鞍下髑髏相對泣，偏裨背負八十創。破旗裹屍橫道旁，  
殘卒忍死哭空城。露布獨有都護名。

公莫舞

公莫舞，公莫舞。鴻門王氣歸真主，何人睚眦赤龍子。手  
循玉玦目相語，令公莫舞。公楚舞，劍光射日白虹吐。人  
發殺機天不與，撞斗帳中咳亞父。霸業明朝棄如土。

長門怨

金壺咽淚蓮花澁，銀箭浮遲渴鳥泣。知更阿監羅襪水，  
暝對星河玉階立。內官唱漏催曉籌，芙蓉夢破燕支愁。  
起來粧罷窺繡戶，三十六院殘燭幽。建章風傳鳳吹遠，  
翠華人幸昭儀館。篋不語，心自語。愁長如天恨，天短  
紅裯暖。踏楊花雪絳，縷閒封守宮血。鸚鵡空猜警蹕聲，  
春寒緊護流蘇結。

寶劍謠

鍊精蒼玉龍景潛萬丈虹孤電走白日老冰立秋空提  
出天地愁八極來清風未逢龍準帝古匣塵土蒙大蛇  
當道兮若斷秋蓬嗚呼寶劍兮亦將遇乎英雄

枯魚過河泣

北溟有鯢散薄崑崙氣吞積石摧禹門過河河水枯蹤  
跡困泥塗垂涎向海若能濟涓滴無中流有魴鯉不貸  
斗升水巨口走噉喙逆游莫若鮪鯢兮鯢兮爾泣何由  
龍伯知決雨津倒天池涿水橫行隨鯢所之揚鬚為謝

卷三十五  
十一  
魴與鯉還有桃花春漲時

玉津園棄景鐘歌

炎精不靈火不德赤燂怒帝喪英魄羿弓射日日無光  
黃金大鑪破釜色天崩七廟移神虞鬼哭長陵一抔土  
十二盤傾夜月寒漢銅仙人淚如雨六龍屈曲眠秋草  
草根蟪蛄語昏曉紫苔滿地愁古春東風吹得乾坤老  
蝸涎鳥篆銀泥剝烏喙蒲牢戲左角更殘漏斷聲莫聞  
凡鷄司晨尊缺鐸

妾薄命

雲母屏琢春冰鮫女織蟬翼輕比妾妾薄命比君君薄  
情紅錦拭鏡照膽明還疑妾貌非傾城傾城從來有人  
如況復君心不如故故人心尚峯九疑新妾那能無故  
時補天天高填海海深不食蓮葍不知妾心

天馬歌

天馬天上龍駒生天漢間兩目夾明月蹄削崑崙山元  
氣飲沆瀣躍步超人寰天上玉帝老不騎饑食虎豹曉

出關滅沒流沙姿剡忽紫電顏黃道三十六萬里日馳  
週天去復還時乎降精渥洼中龍性變化終難攀天馬  
來瑞何朝化為龍應童謠騶虞仁獸恥在垠龍亦絕跡  
歸赤霄風沙豈無大宛種雖有八極安能超天馬來雲  
霧開天廐驤裊鳴龍媒龍媒不鳴鳴駑駘

古硯歌

神媧踏雲補天去遺下一團蒼黑天千年萬年乾不得  
長帶盤古青紫烟玉上剖天天化石石內星精有餘魄



瑤光發炯成禹壁海王川后輪玄液帝青呵霧坤倪濕  
匣月不開太陰泣破天殘缺無人補一穴絲絲漏春雨  
空藏老石磨今古補天何時與天語

五雜組

五雜組角黍絲往復還借書紙不得已居九夷  
五雜組冠冕纓往復還戍卒更不得已困平城

湖上意

晚過鴛鴦浦無心唱採蓮莫嗔蘭槳急為要趁前船

江上意

朝來暮還去，寒潮不曾住。江水亦有情，佳期幾番誤。

甘露寺故舶至瓜洲風作

天造西來險，山迴北固形。斷崖纏赤日，孤柱擘蒼溟。此地何能限，長江或有靈。然犀夜照浪，飲馬曉吞星。鐵鎖沈寥廓，樓船沒杳冥。乾坤一衣帶，吳楚兩郵亭。擊楫人，人倦吹笳處處聽。海門沙自白，瓜步草猶青。夢墮浮家樂，魂遭捩柁醒。計程朝獵地，問舍暮漁汀。倏忽波濤變。

匆忙網罟停疾颺吹蚌室暗雨捲龍庭鼎扇鼃鼃壯谿  
訝樹石腥危檣連偈仄高岸失玲嶼世事無深測生涯  
獨未寧愁煩復消釋題詠紀曾經

送鄧侍郎歸江西

光薦

中國衣冠盡孤臣蹈海迴秦思魯連操漢憶賈生才天  
遠文星隱江平畫鷁催人尋芳草去雁到故鄉來山色  
催行權波聲送客杯身還蘇武節夢泣李陵臺水落蛟  
龍縮城空鼓角哀蒼梧雲浩蕩黃屋浪崔嵬夜雨江蘼

濕春風杜若開祇令少微動慎莫應三台

李翰林墓

嗜酒傲明時何因賀監知承恩金馬詔失意玉環詞名  
與三閭並身將四皓期匡山有書讀應亦嘆歸遲

又

一騎紫鯨去空掩謝山瑩落月今誰弔長庚夜自明乾  
坤沈秀氣江水帶哀聲天上多官府文章不可輕

長相思

昨夜相逢處朦朧春夢中  
遼西書不到莫是戍遼東

月上人還西湖

南峯歸度夏舊業在烟霏  
半夜聞清磬一燈明翠微  
雲蘿尋寺遠猿猱見人稀  
想到經行處天花繞錫飛

次友人春別

波流雲散碧天空魚雁沈沈  
信不通楊柳昏黃晚西月  
梨花明白夜東風秋千庭院  
人初下春半園林酒正中  
背倚欄杆思往事畫樓魂夢  
可曾同

答王子長

病後得書頻情知未立身孤燈風雨夜兩處別離人乙  
鳥歸來社辛夷開過春如逢元白問莫說為詩貧

廢宅

金谷花開得幾春東風吹逐路旁塵蛙鳴私地為官地  
燕認新人是故人珠履賣錢豪客散玉釵乘傳舞娥顰  
獸環一鎖歌鐘斷時有鴉聲恐四隣

春愁

金雁塵香暗鳳絃紅繩風緊閣秋千園林寂寞無鶯燕  
一段春愁是杜鵑

南峯宴坐僧

空出稿木形入定掩松扃鵲供銜來菓猿看誦罷經雲  
霞埋衲重苔蘚上鞋青只有樵人識曾因採茯苓

訪山中隱者

遙聞搗藥聲知有幽人家相尋却無路又隔一谿花

別惠上人

秋歸虎谿月攜錫入雲松又向深山住還聞古寺鐘出  
生供野鳥持呪伏潭龍好去東林下吟看五老峯

銅陵五松山中

樵聲聞遠林流水隔雲深茅屋在何處桃花無路尋身  
黃松上鼠頭白竹間禽應有仙家住避秦來至今

浦口

浦口晚潮來佳期那可待浪急打蘭舟蘋花更難採

山中書事



學道志雲霄自然塵念拋  
雨寬琴上線風響樹間瓢  
果熟供猿食松高任鶴巢  
看他陳處士終被華山招

秦伯廟

古者吾夫子曾稱三讓名  
後來秦失鹿劉項死相爭

三高祠

退能合天道隱亦是人豪  
借問祠前水如今幾個高

金陵送倪水西之江陵

楚江江上暮雲東  
萬里春波去意濃  
桃葉歌殘秣陵酒

梨花夢斷景陽鐘  
沅湘水落瓊瑤合  
巴蜀山來錦繡重  
回雁峯前見歸雁  
相思何處再相逢

戍婦言

姑嫜有妾奉征戰  
盍卽行早取封侯去  
封侯妾亦榮

送葛鍊師遠遊

仙翁去醉碧桃春  
鶴背風吹萬里身  
洞裏棋高饒幾子  
瓢中詩好寄何人  
三峯紫翠浮芒屨  
五岳烟霞染葛巾  
歸日定知能縮地  
莫教青竹化龍鱗

雲雨

雲雨朝朝暮暮新襄王魂斷楚江春  
武丁曾有中宵夢  
惟覓巖前版築人

華蓋峰逸人

十步九崕壑結茅無四隣  
山中春雨過水上落花新  
採藥逢毛女焚香對羽人  
時攜一瓢酒醉著去朝真

岳陽夜泊圖

長憶巴陵山水秋  
老來看畫却成愁  
箇中無聽猿啼處

若聽猿啼更淚流

江南思

暮雨娥皇廟春風西子城  
相思行不得更聽鷓鴣聲

寄王子長

薄宦仍依楚長聞傍酒壚  
客愁三月盡春夢五更初  
吟卷看花掩行牀並竹鋪  
江湖有佳句知我每相於

明皇竝轡圖

三郎沈醉玉環隨不上金輿  
索馬騎老大獨歸南內裏

風流無復竝鞍時

贈皖山道士

世人曾不識頭帶樹皮冠  
閒種藥來賣醉將琴去彈  
鶴銜仙果下猿竊玉書看  
莫服丹砂好恐師生羽翰

送謝士良之江東

謝安遊賞去別酒惜臨分  
萬里甘為客三春苦送君  
風帆歌逆水江樹入空雲  
若過青山下須題李白墳

春閨

閒畫金釵記遠人杜鵑啼血又殘春琵琶絃上無多字  
近日相思彈不真

送僧還天目

鈺錫亂峯西藤蘿畫掩扉山藏翠微寺僧向白雲歸  
梵寂風沈磬禪深雲到衣想曾行道處猿鳥共忘機

破窓

鮮畫蟲絲紙半無雨分錢點入櫺疎秋風吹得春燈滅  
螢火飛來照讀書

寄柳陽廖有大

遠宦身安不題書  
淚幾行千山萬水路  
一日九迴腸  
鷓鴣懷春語  
靡蕪入夢香  
王孫歸未得  
歸得早還鄉

沙門島

孤嶼壓滄海  
風濤直下危  
蛟人依蜃市  
魚女祭龍祠  
月黑犀牛鬪  
波紅螭螭垂  
登臨有奇觀  
感慨但言詩

漢宮

武帝昇霞玉殿空  
金人夜泣月明中  
三千嬪御無行幸

曾費丹砂飼守宮

沙上

四望無邊際中浮一片沙  
人家居釣艇官賦種蘆花  
渚綠紅蒿短江清白鳥斜垂  
流欲東去萬里寄生涯

牆頭杏花

紅杏西隣樹過牆無數  
花相煩問春色端的屬誰家

金陵懷古

宮甃賣盡雨崩牆  
首藉秋紅滿夕陽  
玉樹後庭花不見



北人鉏地種茴香

墨梅寄因上人

寒枝香在天外疎  
花影流水中梨雲  
夜深清夢草玄筆  
底春風

又

夢覺霜林墮月眼  
明野水浮枝橫玉  
不吹春去斷縑閒  
寫相思

長信秋

長信秋來月自圓  
夜香猶拜玉階前  
妾今不願君王寵  
惟願君王壽萬年

句曲王尊師

不與俗人接草堂  
雲自封有時鍊丹去  
無處覓行蹤  
樹暖猴捫蝨花香  
鹿養茸曾期尸解後  
終隱大茅峰

萍

風波長不定浪跡在天涯  
莫怨身輕薄生前是柳花

山中僧

雪頂霜眉齒半稀  
跣趺苔石看雲歸  
山童掃葉鶴飛起  
狼籍松花滿衲衣

唐人四馬卷

金銜初脫齒新齊  
蹄玉無聲赤汗微  
昨日杏園春宴罷  
滿身紅雨帶花歸

又

簇仗回來玉勒閒  
黃門牽向落花間  
君王不愛長楊獵  
嘶入春風十二閑

又

霜蹄踏月早朝回尾弄紅絲拂紫苔日暖龍池初洗罷  
尚方聞進御鞍來

又

太僕新調試錦韉九重日色照連錢春來興慶池邊路  
偏稱宮中軟玉鞭

宮人斜

步搖明月冷無光骨掩春泥草亦芳艷魄不隨紅粉盡

化為蝴蝶舞昭陽

遊楞伽寺

蘿逕入蒼靄鐘聲來翠微  
招提在何許雲外一僧歸

猿

巴峽聞聲愁斷腸冷泉照影綠陰涼  
藤搖亂雨領兒過樹曬斜陽拾蝨忙  
獻菓去尋幽洞遠攀蘿來撼落花香  
空山月暗無人見啼入白雲深處藏

鶴

毛骨珊珊白雪清  
千年世上頂丹成  
晴飛碧落秋空濶  
露立瑤臺夜月明  
仙島雲深歸有信  
天壇花落步無聲  
時來華表何人識  
依舊翻身上玉京

遊天姥山

欲去不得路自將  
蘿蔦捫相逢採藥叟  
偶入落花村晴  
草鹿眠軟雨潭魚上  
渾無人動煙火應  
取曉霞吞

寄題無照西園

近地棲禪室祇園  
草木薰鞋香花洞  
雨衣潤石欄雲松

吹和琴雜茶煙到樹分遙知道林輩來此論元文

寄斷江上人

長江瀉百灘句截斷狂瀾片石青松下孤風白日寒空  
花隨塵落曉月對棋殘誰共清吟癖岳扉敞夜關

寄錢翼之

作賦擬相如何人誦子虛琴彈中散操扇玩右軍書北  
闕青雲近南冠白髮疎煩君傳遺逸著我入樵漁

揚州即事

玉壘開方面金湯控上游連營驃騎宅重柝雁行樓強  
弩虛空發飛橋日夜浮煙生烽燧地草死虎貔秋此處  
兵威震當時國步憂六年襄郡守三策蓋臣謀大將深  
圍陷長江萬里休兩淮先按堵孤注獨橫籌破竹纔乘  
勢聞風已置郵乾坤機軸轉海嶽版圖收春變山堂柳  
波通汴水鷗平坡南下馬遠渡北來舟無復瓊花夢猶  
餘芍藥愁塵埃何豎子還擁黑貂裘

商人婦



日日湖頭望望夫夫未回無情春水恨祇送別船來

玉環病齒圖

一點春寒入瓠犀海棠花下獨頻眉內厨幾日無宣喚  
不問君王索荔枝

琵琶

一片相思木聲含古塞秋琵琶是誰製長撥別離愁

杜工部祠

老病思明主乾坤入苦吟秋風茅屋句春日杜鵑心詩

史孤忠在文星萬古沈  
祇應憶李白到海去相尋

山中

半嶺松聲樵客分  
一溪春草鹿成羣  
採芝人入翠微去  
丹竈石壇空白雲

湘竹杖寄無住

采向舜妃江廟前  
得來賈客水蘭船  
老宜泉石搯慵態  
吟稱煙霞倚瘦肩  
晏坐夜和金錫憩  
經行春草紫苔穿  
知師道價神龍護  
莫漫騰空去九天

老將

殺氣消磨暗鐵衣  
夜看太白劍無輝  
舊時麾下誰相問  
半去封侯半不歸

老馬

瘦蹄生入玉門關  
病放沙場戰骨閒  
歸齧殘芻應有淚  
將軍頭白戍天山

老農

倩搔背痒坐深村  
愛說前朝賜帛恩  
縣帖不來尋社長

自攤牛契教玄孫

老牛

草繩穿鼻繫柴扉  
殘喘無人問是非  
春雨一犁鞭不動  
夕陽空送牧兒歸

如鏡伐竹架過牆  
葡萄斷竹插地復  
生枝葉無住  
序曰瑞竹余以詩贈之

為引寒藤延晚翠  
試栽碧玉動秋根  
鳳梢依舊生虛籟  
龍籜相將添遠孫  
林月過庭窺斷影  
茶煙潤色到啼痕

湯休麗藻題還徧貝葉應多此處繙

無題

花影玲瓏滿繡牀自調綠綺背紅窗  
惆悵佳期學絃線  
七條哀怨不成雙

寄衣曲

聞有宮袍賜翻令閨意傷  
良人在行伍祇待妾衣裳

又

征衣須早寄遙憶藁砧寒  
莫訝啼痕少相思淚已乾

贈竺鍊師

姓疑乾竺古先生霞外幽栖近四明履斗星移冠劍影  
步虛風引珮環聲藥宮夜喚青鸞降花洞朝騎白鹿行  
長使芝童看藥竈為耽瓊液過蓬瀛鶴傳仙語歸華表  
魚寄丹書上赤城怪石醉中拈筆畫險碁靜裏按圖爭  
玉桃竊慣慵留種瑶草尋多盡識名縮地日攜龍作杖  
卧雲時約鳳吹笙海邊定與安期遇關上當逢尹喜迎  
我本翠寒山道士相隨便欲採黃精

送翟上人

聖代容高尚山林隱去休方知堯舜日亦自有巢由

贈日東僧

肄業重溟外隨緣大夏中錫飛鯨海靜杯渡蜃樓空音  
信千峯隔華夷一水通秋深故國夢應與逝川東

江山萬里圖

咫尺寒流千萬峰湍聲寂寂暮猿空買船欲泛春潮雨  
楚樹吳雲是畫中

江南曲

遙天碧蕩蕩遠樹綠悃悃併作相思海春來一樣深

蕃釐觀感瓊花

后土祠南裔坤維媿室家國封嚴典禮宮祀尚褒嘉不  
是神靈異安能眷邇遐應須有玉女到此賞瓊葩麗服  
從空降明珠倚日斜同揮五雲扇共駐七香車月姊羞  
調粉風姨罷散花青童迴絳節金母屏彤霞故事唐時  
盛佳名數代誇塵根雖下累天意在中華雪讓瓏璵巧



冰銷刻鏤瑕人間惟獨爾地上更何加萬籥殊寥落羣  
芳避艷邪玫瑰誠執御芍藥等泥沙聖運俄驚輟兵強  
忽肆拏舛訛難核實真贗遂聳牙雷雨還驚蟄潛藏重  
發芽旁枝徵舊茁新葉漫榮荂尤品終蕪沒珍蕤逐水  
涯兩朝成草莽九廟雜龍蛇古殿蘭旗暗殘爐桂燎賒  
舜顏愁想像珠樹絕驕奢寂寞無雙譽徘徊但自嗟八  
仙聊免俗消得寶欄遮

送母丘秀才自黔中歸益川

黔南萬里地，劍外去寧親。  
蜀魄花成血，山魃樹隱身。  
竹枝歌峽夜，椰子醉蠻春。  
歸訪王孫宅，彈琴有故人。

郊外晚望

野曠行人少，林荒夕照微。  
煙中一聲笛，何處牧兒歸。

揚州

紅橋二十四，明月照笙歌。  
若是迷樓在，遊人應更多。

寄山中僧

名山舊隱巖，巖秀精舍蕭。  
閒殿閣虛像，禮梅檀千古佛。

經翻貝葉五天書獸依草座跏趺後禽下花臺施食餘  
空翠濕衣橫即栗紺泉澄盎涌芙蓉鷺峰夢遶雲中寺  
鹿苑身栖物外居清梵夜迴松月冷孤禪晝起栢煙疎  
曙鐘寒韻侵虛籟午供春香入野蕪道念有時憐老病  
塵緣無計問真如遠公若許來同社陶令何妨去結廬  
便向東林傍尊宿菩提從此發心初

遊三茅華陽諸洞

冠帶寒星帔剪霞步虛去宴玉宸家醉歸却跨青鸞下

衝落碧桃無數花

又

玉案清香徹夜焚紫煙成蓋覆茅君數聲金磬秋壇霽  
敲碎遙天一縷雲

又

書滿琅函閉不開雲牕霧閣鎖青苔門前白鹿將麕過  
定是避秦人引來

又

淡染雲霞五色衣  
杏壇朝罷對花披  
洞中養隻千年鶴  
長被仙人來借騎

墨梅

生意玄煙裏  
春工毛穎中  
枝頭兩三蕊  
開不假東風似  
到孤山下  
斜枝入眼中  
分明幾點雪  
欲折又成空

杭州

錦繡波翻太液空  
一池寒雨落芙蓉  
內前尚有中官住  
却聽西蕃寺裏鐘

羅嘖曲

玉井荷花碧中藏偶意深綠房千萬箇多少可憐心

四皓

四老本英雄來成羽翼功倘令秦重士未必隱山中

子陵

乾坤罷戰塵漁釣可藏身何事劉文叔猶來覓故人

孔明

有心興漢室不意託孤兒帝昔曾三顧臣今表出師

淵明

心寄羲皇上生逢晉宋時風流千古意只有杜鵑知

春歸

報道春歸去忙來看落紅豈知春不去還在綠陰中

漁父

細草成春服汲湘供晚炊人間風浪險醉裏幾曾知

馬塍

桃李宮城近偏承雨露恩至今耕種地一半作花園

蘇堤

漢苑花何處唐陵栢已空相逢大堤柳令我憶蘇公

玉津園

御愛花無主長生樹幾時青青輦路草盡屬牧羊兒

武穆墳

若論將軍勇神京反掌圖中原數千里可惜葬西湖

祚德廟

祀典當時盛忠曾保趙孤誰知宋祚絕今與廟俱無



景靈宮

孟月祠原廟都人憶故宮當年駕幸處喬木鳥呼風

杭州

山勢猶龍鳳行宮已劫灰北人偏悵望曾見汴京來

建業懷古

離居迫馳道晨往內西門屏營無顧問偶逢路人言昔  
有六代宮今為百姓園阿閣餘故基層城但頽垣金鋪  
失巖邃玉座變荒原陳昏蚤墮滅隋奢亟崩奔樂極終

復悲替興相覆翻結綺徒構恨臨春工埋寃貴嬪艷亦  
無麗華皆不存高墜烏烏集沃壤蓬蔴繁鴉如拜月魄  
蝶化尋芳魂草遺舊裙色花泣新啼痕空餘龍津水流  
入魚藻渾猶涵睿澤在尚感陽和恩孰知涓滴微曾悅  
萬乘尊坐令芻蕘賤襍飲汙其源念彼禾黍地淒然難  
具論寵深乃自辱涕下還成吞

海上自之罘至成山覽秦皇漢武遺跡

霧氣沈坤極濤聲撼北溟雲霞五色水丹碧萬重屏脈

絡華夷秀并吞宇宙青石梁橫地戶洞構壓風霆砰磕  
紛鳴鼓瀟洶疾建瓴提封思霸主巡守陟遐垌黔首何  
多難皇居不少寧山驅麟避藪海塞蜃遷庭鹵薄周荒  
服鱗蟲畏典刑天吳驚象駕精衛泣鑿鈴浪激秦嬴怒  
堦崩漢武靈空悲祖龍死但覺鮑魚腥采藥終驕妄求  
仙竟杳冥惟聞傳二世無復享千齡古昔飛騰客能存  
變化形解交烏兔髓定翳鳳凰翎玉檢微藏昔金丹別  
有經東華司竿歷南岳考功銘億劫開元闕三宮護紫

烏窰仁斯可冀淫暴詎堪聽漫致安期烏虛邀阿母  
崑池波鼎沸阿閣土花零夜雨虵升樹春潮蛤上汀  
茂陵迷亂草禁苑暗流螢奢侈如飄電危亡若炳星  
明君當至治方士或來停火宅休生棘情河易轉萍  
願逢清靜化昌運幾時丁

憶舊寄金陵馮壽之

憶昔江東日離居託孟隣儒家見君好談席偶情親  
南斗文昌近西山爽氣新驪珠驚俗眼琪樹倚芳晨  
大雅

今重覩竒才豈易倫  
珊瑚生海網汗血出天津  
句滿雞林賈名齊  
雁塔人傳經心入聖  
用筆意凝神射策應先  
手藏環定後身巨流思  
待濟吾道詘當伸  
落魄傷遲邁依棲笑  
隱淪三年為倦翼萬里  
作窮鱗伏枕思霜橘歸  
溪戀紫萼鴻稀石城信  
魚隔太湖濱故宅閒多  
草空船獨採蘋夜吟酬  
蟋蟀暮景歎麒麟老恐  
襟期斷悲懷轍跡陳  
舊峰還似洛淮水想猶  
秦勝地登臨數殊鄉夢  
寐頻潮吞李白月花動  
謝安春有興須相覓無  
聊漫自呻休

疑交契濶尚覺膽輪困遠物那堪贈佳音欲細詢勞歌  
因奉寄題罷更沾巾

詠石得天字

肢脈崑崙析胚胎混沌先靈分元島峙秀聚景雲鮮覆  
壓風雷窟支撐宇宙穿峻嶒歌篠霧歷棘聳蘿煙葉葉  
棲危壁磷磷過瘦涓雨攻繩眼斷浪擊彈窩圓筆架珊  
瑚豎屏圍瑪瑙偏骨攢猗鬼竦脊凸老蛟跽劍卓空蒼  
色矛森紫翠顛醜宜鑄鳥篆剛可利龍泉怪漬潮紋濕

頑和地軸連箕箒梢映帶薜荔葉縈纏磊砢蛇身縮崩  
爭鳳勢偏薜侵題字處藤絡倚筇邊碎礫鋪文貝尖峰  
砒黛蓮竇深膏乳滴甕潤土花沿儼若峨冠者昂如峻  
士馬磴危欺木屐磯滑怯苔氈移恐嵐光動捫嗔野蔓  
牽衝湍聲類磬謝瀑韻成絃硬性辭斤鑿嵌形欠畫傳  
鼓歌傷莫續鼎句歎難聯砥礪誠由著磨礪學及遷畜  
竒希抱璞煉餌詫飛仙寸勢垂千仞鬼胎結幾年巖輝  
知產玉峽東見奔川織女支機穩山人作枕便隕星沈

戰域敲火出魚船異或稱羊化疑應訝虎眠龜埋遺碣  
下麟仆古塋前屹立中流壯平施大礎堅懷沙嗟故逐  
凝魄惜嬋娟德必穹碑紀詞當巨硯研險思經灑瀕功  
擬勒燕然嵩岱歸諸掌蓬瀛寄一拳不須填碧海直欲  
補青天

荅無住和太初韻見寄

寶地人來少檉陰自晚晴片雲依石潤孤磬出花清竹  
筧分泉細檀香上氈輕勒銘留水寺應供宿江城適楚



濤喧定歸吳雪滯行雨苔粘凍屐廊葉覆閒枰琴為蛇  
紋買書因鳥跡評眼前無佛祖詩癖有山兄句妙唐風  
在心空漢月明畫禪休樹影夜梵雜松聲夏減遊方興  
秋添住岳情何時修白業去結嬾殘盟

簡翼之

碧樹綠蕪空亂雲故人何處隔江村舊書在手再三讀  
新恨從頭又一番竹幘隨行家具活蘭亭摹出典刑存  
幾時定訪揚雄宅為問太玄經裏言

送陳衡中之越

見說會稽郡風流如晉時  
貧惟將母去清不要人知  
修竹王猷宅春風夏禹祠  
到官游有暇好寄剡中詩

蟬

高柳夕陽收繁絃奏未休  
數聲風露飽一榖古今愁  
涼思知秦樹哀鳴亂渭流  
年年離別處幾曲送殘秋

上馮集賢

忠言如海膽如山趣入端門  
虎豹間玉笋曉班聯鷺序

紫檀春殿對龍顏  
氣凌百辟星辰動  
賦就三都造化閒  
豈向長沙淹賈傅  
溥風會見筆追還

送閔思齊浙東帥府掾

南越連閩徼東瀛  
貢百蠻軍營威帥  
閫記室比官班之  
子稱時彥羣公譽  
早攀詩壇堪白戰  
幕府正朱顏橫槩  
金飈動談兵王帳  
閒貨通夷舶富民  
羨國風還夜柝鯨  
潛海春旗豹隱山  
攜琴遊有暇挈榼  
酒休慳將佐知書  
貴勲名待詔頒孟  
堅詞訟作留照汗  
青間

喜馬伯庸待制扈從還京

嚴蹕傳聲入建章漢宮趨陛肅鴛行駕迴黃道清塵動  
人在金鑾白日長承詔曉聞天語近賜衣春覺聖恩香  
馬卿賦獵兼忠諫獨許駿乘錫尚方

送陳行之之信州推官

漢守曾懸榻家聲復世綸贊廉推士雅列郡重嘉賓昭  
代詳刑讞賢僚體聖仁袴襦憐故老狴犴念寃人英幹  
登時望文華異等倫固宜膺寵渥豈但活罷民江左開

藩舊風流佐幕新平反須有頌剛決看如神却鑒初榮  
養黃香早締嫻錦還鄉已畫綵戲室俄春自補尋山屐  
誰親墊雨中拊循恩易洽煦嫗俗當淳曲動陽關疊樽  
移祖帳陳未能忘手握何得更情親羨爾丹霄貴悲余  
白髮貧尚期金鼎藥猶客素衣塵巖壑將幽賞煙霞欲  
隱淪交游千古事離別百年身楚澤寒多雁吳波暖見  
鱗相思不相見音問莫辭頻

寄翰苑所知

多士當文治明良際盛時騷壇先佩印策陣已褰旗西  
極蹄千里南溟翼四垂疾雷天地破崩嶽鬼神移學過  
三都賦神超七步詩陰何須大賞鮑謝只平欺尺璧光  
難掩華鐘響發遲人遊丹桂窟鳳噉碧梧枝漢室方虛  
席枚臯復擅詞數承恩詔見趨赴重官儀皇閣登清要  
蒼生息舊疲星辰侵履舄桃李傍堦墀珂里豪家逐銅  
駝樂部隨行歌金騶裊醉舞玉參差杜曲花偏滿蓬壺  
酒不辭弓開射熊館劍倚化龍陂秀彥居同窠軒車出

共馳侯門相雜選寒素獨吁嘻塵榻應容下仙舟可待  
追亦慚才莫逮終負志難衰攀附羞蘿蔦徬徨向路歧  
未酬題柱興徒抱練絲悲幽谷音猶溢鹽車力尚卑泥  
途淹駮駟荆棘困黃鸝睨睨還求友騰驤却避羈愁吟  
長缺伴閒夢矮牀知縫掖今誰貴乘桴任所之短章非  
善頌聊以展吾私

尋貞白先生舊居

百折厓雲嶠千花通水源寒藤垂到地怪石立當門白

壤煉丹赤清池磨劍渾曾來經誦處片雨滴苔痕

江干暮泊

野色隨墟落江皋煙景饒遠村明晚燒高岸沒春潮覽  
鏡芳年去援毫藻思銷琴書苦行役不敢問漁樵

子陵祠堂

一見故人歸去來漁竿不肯博三台漢陵今日無抔土  
惟獨先生有釣臺

己亥秋淮南饑客中懷故里朋遊寄之



行李依吳榜，飄蓬更楚鄉。  
山川歲云暮，風雨夜何長。  
此地從兵革，斯民復旱蝗。  
薦饑懷賑粟，久渴望攜漿。  
船婦爭遺穗，樵童拾棄芒。  
哭喪多藁葬，征旅少贏糧。  
豈有災重併而無，戶損傷一年。  
租幸免衆口，飯誰將生晚。  
羞干祿，憂時念彼蒼。  
悲歌思請劍，頽墮輒椎牀。  
宵枕當寒溜，晨梳候曙光。  
牧羊人戢戢，放馬草荒荒。  
木落明秋野，江空月照霜。  
城烏頭併白，水樹葉先黃。  
羈客情難遣，朋儕興不忘。  
投瓊花院內，博塞竹林旁。  
尚恐詩盟淺，猶嗔吏

鞅妨偏提隨款段，筇下滄浪稍遂田園計。終須蘿薜  
藏松筠，親戚輩麋鹿。弟兄行春寺，尋暄暖。晴波泛渺茫，  
清泉濯足冷。紫菊染巾香，醉任王侯貴。閒辭禮數忙，龐  
公厭州府。陶令樂柴桑，酬答幽期愜。交游素願償，短章  
應得附。真賞莫能量，頗似岑參句。名因杜甫揚，流傳千  
載後。直欲繼前唐。

南峰歸雲菴

雲伴老僧居翠微，老僧應共白雲飛。杖藜西去人東去。

日暮僧歸雲亦歸

建業閒居春思

杜曲芳菲早江城店舍烟雨青榆莢地風白柳花天愁  
結丁香上醒餘禁酒前病多遊冶少春事亦留連

寄眠雲處士

聞說華陽洞人間第八天茅君旌屢降弘景駕常延地  
吐黃金氣潭流碧玉泉神丹光夜發朱草葉春妍羽客  
家相接麟洲脈共連山遺秦女藥鋤得漢朝錢處士懷

貞遁長生契宿緣童顏曾辟穀鶴相合成仙嘯傲三峯  
上披研萬化先囊攢五行物劍握七星權石鈿青精飯  
風爐紫朮煙赤松齊遠躅玄俗並遐肩九轉功將就雙  
親念復虔却攜瓊笈轉歸枕白雲眠薊子家嘗歷壺公  
訣盡傳路回蓬島下杖化葛陂邊經案苔侵徧閒枰雨  
滴穿池留洗瓢水壁挂斷琴絃蕙帳損空怨蘿牕月自  
懸岳存容悵望澗去意潺湲局久碁多變寰清鼎又遷  
衲衣期異日築室定他年季世嗟予晚幽栖志獨堅欲

隨蒲坐具已辦布行纏學道無如此游方恐未然尚遲  
甘旨奉更被苦恩牽腦慮精難滿心憂影或偏蘓壇情  
願掃茶竈手能煎根究嬰兒後參同混沌前求真不易  
遇師匠早哀憐

辟支岳道人

髮寒多不剃門雪少曾開瓦鉢幾星芋石牀三面苔緣  
衣蝨嬾拾避獵鹿長來見說岳頭樹前生手自栽

水驛

水驛相連曉夜行  
渾無心記短長亭  
莫笑楊花道飄泊  
人生自有一浮萍

李陵臺

寒風揚塵走沙石  
朔氣僵人馬  
辟易五千步  
卒當數萬  
空拳奮張爭無敵  
單于趣降聲疾呼  
道窮矢盡身為俘  
歸無面目見天子  
築臺何顏懷古都  
義血不染戰場草  
寧甘北首陰山老  
空垂遠涕望漢天  
難洒茂陵松栢邊

靈巖寺上方

霸業銷沈煙樹濃  
吳王臺殿楚王宮  
廡廊人去土花碧  
香逕僧歸秋葉紅  
颺母射岳風動地  
蛟精徙穴霧迷空  
明朝江郭重回首  
寺在翠微蒼靄中

大滌山道士

童顏幾寒暑  
編葉當衣裳  
琴古面無漆  
栢枯身有香  
樹精為老僕  
石髓作乾糧  
不語坐松下  
天風吹髮涼

西湖酒家壁畫枯木

衡岳喬松道途遠  
成都古栢山川隔  
忽驚老樹刺眼來

疑是頽崖壓東壁，拗怒風雷龍虎氣。盤摺造化乾坤力，  
陰連滄海一片秋。秀奪西湖兩峯色，寒雲冉冉靈晝影。  
凍蘚綠沿借春碧，醉翁睥睨欲掛衣。禪伯經營思憩錫，  
烏鳶冥下踏枝空。猿猱夜過嗔藤仄，鐵幹銅柯嗅不香。  
蒼雪玄煙潤將滴，便擬攀蘿解糾纏。何煩平地生荆棘，  
直須掃去曲磔姿。揮作昂霄數千尺。

客夜思親

老妻病女去淮西，慈母居吳鶴髮衰。我獨天涯聽夜雨，



寒燈三處照相思

梁隆吉遺馮筆并詩答以長句

吳剛夜入廣寒闕生擒老兔出秋月嫦娥泣雨蟾影孤  
靈藥不舂玉杵歇桂花凝毫拔蒼綠蜀絲纏金縷湘竹  
紫蘭葢笑春風愁蓮花仙冠墜簪玉松腴點漆光照眸  
藤肪搗雪滑欲流樂毅小帖排銀鈎天馬歷塊無九州  
夢中忘筆那有花古錐畫地飛龍蛇覺來尋錐亦無處  
但見鳥跡留平沙

二喬卷

國色雙飛相並栽周郎分得小枝來漢宮早有君王見  
金屋須教一處開

南岳李道士畫雙松圖

道士醉卧天柱峰睥睨石上千年之老松松精相感入  
夢寐化作蒼髯雙老龍酒腸空洞生鱗角飛出兩龍醉  
不覺須臾霹靂撼五岳豐隆縮手不敢捉神靈頃刻歸  
虛無壁上但見雙松圖松耶龍耶莫能詰棟梁霖雨藏

禿筆

明皇卧吹簫圖

珊瑚枕上玉簫橫一曲霓裳萬里行漫道九重宮殿遠  
幾曾掩得外邊聲

僧日觀畫蒲萄

玉山道人蒼壁立胸瀦萬斛松煤汁吐作千年古怪藤  
猶帶西湖煙雨濕元氣淋漓草木活太陰菌蠢蟲蛇蟄  
鬚縈翠霧瘦蛟走睛抉玄珠黑龍泣神剌鬼刻字崛竒

水精火齊光陸離  
天魔擎來青帝寶  
鯨波涌出珊瑚枝  
墨花酣春馬乳漲  
醉夢渴想西涼姿  
風牕秋疑蝨葉語  
露架夜憶虬柯垂  
須臾掩卷何所見  
月落庭空無影時

喜虛碧自龍虎歸

雨中風帽別真師  
雲滿天壇駕鶴遲  
囊佩山圖行幾日  
棋逢仙容看多時  
丹房芝朮春英長  
玉洞煙霞夜夢離  
定有壺公遠相送  
瓢中添著幾篇詩

琵琶亭

聽徹哀絃淚兩行香山居士未心降當年杜老吞聲哭  
恨不相逢在曲江

雨篷為吟友題

家分半席並鷗眠興墮吳頭楚尾天機杼曉聲柔櫓月  
簾惟暝色片帆煙魚龍窟宅同春夢雞犬圖書當夜船  
咫尺五湖晴景好釣竿閒在草堂前

昭君曲

荒城萬里風雪寒妾行雖危漢室安漢室已安妾終老

妾顏穹廬豈長好漢家將相多良策更選嬋娟滿宮掖  
單于世世求和親漢塞自此無風塵

虎丘

吳晉豪華冷劫灰竺乾金刹壓崔嵬玄黃半夜虎精泄  
紫翠一峯鼇背來池水暗通浦海入巖扉寒枕白雲開  
輪蹄未散鬼吟寂萬壑松風僧定回

送金華黃晉卿之諸暨州判官

夫子今衡鑑斯文屬在茲擅場年鼎盛抱業器瓌奇鸚

薦蘄頭角鶯遷奮羽儀詞源傾渤澥筆陣偃蛟螭太極  
鈎金賦先儒射策辭秋闈前決勝春榜後名馳激切波  
瀾立鐫鑿物象危光芒牛斗宿標格鳳凰池袍色宮花  
稱才華制草宜馬驕曾杏苑臚唱占丹墀王事勤周佐  
官聯逼郡麾談經猶寶地視篆必瓜期漸覺腰章寵徐  
看利澤施治應黃霸最民定邵崇思郢雪聆高調郇雲  
喜近披晚陪靈運屐早訪董生帷梓匠寧辭斲樗材忝  
辱知塵凡勞點化傳玩指瑕疵我自哀王粲伊誰說項

斯碧山招未隱白髮病相欺  
歲晏空江急風迴落木悲  
雨來孤枕夜夢別故人時  
留滯飄蓬梗攀援折桂枝  
願言多善政尚得播聲時

觀沈氏盆開雙頭蓮花戲作

一枝傾國又傾城  
笑並香腮百媚生  
湘浦二妃窺寶鏡  
星宮雙陸下銀泓  
金波影儷嬋娟巧  
玉露心分沆瀣清  
曾向鴛鴦屏上看  
野花空得合歡名

送宗上人遊金陵



千峯亂水上一榻到應分古像焚香禮寒鐘出定聞瓶  
離劔池月錫入秣陵雲好去北山住草堂休勒文

吳中菊花盛開

菊花三百六十種處處名園花不同安得化身千百億  
一花著取一吟翁

悼郭祥卿錄判

燕臺氣槩汾陽裔赤驥騰驤彩鳳飛吏鞅晚淹彭澤米  
酒錢春典杜陵衣西山手板情還適東里角巾身不歸

空有遺文落人世朱絃聲絕賞音稀

題玉環聯轡圖

赭袍紅暎縷金衣笑並花驄酒力微試問六龍西幸日  
有人曾侍翠華歸

閱張上卿仙遊錄

漢祖龍飛日真人豹隱中綸音來薊北驛傳起江東聖  
德深弘教玄門厚植功垂衣軒帝治問道廣成風獸夢  
符坤極鴻門建震宮雨敷皇澤意雪應紫宸衷白玉刊

章重黃門範樞雄制詞天藻疊冠佩露華濃宣室繁釐  
受高謀敬祀恭嚴齋迎景祚正念格宸穹宇宙樞機運  
雷霆寂默通扈驂鑿從近恩賚上方隆喬演留侯系經  
開柱史蒙五朝膺顯渥百辟仰精忠宗戚勲封盛師生  
祿秩崇力辭君九錫首邁爵三公第宅仙官府逍遙綺  
皓翁漆園春未老蓬島藥何窮詔下瑤京鶴神昇絳闕  
虹自期冲舉去誰識壽齡終霄駕烟霞遠星壇杖屨空  
圖容曾翰苑遺蹟漫崆峒太上元無象微謠詎得工獨

存清淨化為國致年豐

答無住上人

隱去看看白髮新  
草堂資盡箇生塵  
五陵亦有閒相識  
只把黃金笑買春

吳江石橋新成

五色何年補次寥  
百弓無地駕瓊瑶  
老龍千尺卧寒玉  
雌霓半空橫彩綃  
天路行看星象逼  
江濤怒息水犀囂  
騎鯨便欲超銀漢  
直踐台階挹斗杓

淵明像

環堵蕭然瓢屢空不詳姓字一衰翁此身自謂義皇上  
却墮閒人畫卷中

答馬懷秀兄弟見訪

移家連晚歲屏跡值春寒舊業遺松逕幽棲遠杏壇數  
椽容膝易五斗折腰難有客來排闥無人為整冠諷詩  
稱鮑照卧雪念袁安下里誰余和高山爾自彈迎門屐  
齒折扶病帶圍寬乍喜交時彥相尋到冷官隣驚都騎

盛僕出草堂看光價連城壁風流菰苑蘭老嗟傾蓋晚  
貧覺布衣單午竈添茶具煙蓑罷釣竿傳呼聞杜曲榮  
耀滿江干文雅多歌艷殷勤少接歡長鯨鈎上掣巨闕  
匣中蟠筆力千鈞弩襟懷百丈瀾籍通金馬選詔待紫  
泥乾樂毅曾強趙夷吾遂霸桓貴應聯萬石功定服三  
韓留取刊彝鼎勲名未汝闕

太白扁舟圖

錦袍煙艇夜郎西酒思金鑾入直時不道相思杜陵老

愁吟落月屋梁詩

雨夜懷虛碧

共有烟霞疾襟期江海分故人年老別寒雨夜深聞地  
肺潛通嶽峩眉秀拂雲何時負笈去稽首五千文

清明病中

少年令節醉花前老病花前服藥眠自檢銅人試榆火  
午窓燒艾起新煙

簡無功

種種念余髮垂垂懷老禪公卿既無分巾盜欲隨緣布  
鞞雲門寺銅瓶雪竇泉他年調水拈鼻孔不煩穿

春歸

釀蜜筒香蜂報衙杏梁泥歇燕成家浮萍斷送春歸去  
盡向東流載落花

漁莊為魏濟民賦

彭澤歸來菊未荒便投簪紱弄滄浪一蓬煙火尊鱸興  
數畝茅茨橘柚香欸乃幾時歌古調蘆篠何處避殘陽



釣閒若枕圖書卧應被人稱是墨莊

雪夜有懷

雪壓狐裘醉玉京夜聞歌吹到天明  
寒牕病起今頭白始聽春蠶食葉聲

竹枝詞

莫折閭門楊柳條帶將離恨過楓橋  
向道春愁不禁蕩蘭舟長放櫓輕搖

唐宮詞補遺

海內昇平服四夷遠邦貢物盡珍竒近頒手詔俱停罷  
獨許南方進荔枝

又

罷朝輕輦駐花邊催喚黃門住靜鞭三十六宮人笑語  
上前爭索洗兒錢

又

昭陽仙仗五雲中遙聽笙簫起碧空夜半月明人望幸  
君王自在廣寒宮

又

宮娥隨駕蜀山迴  
春日還從內苑來  
聞道上皇憂寢食  
御前休報海棠開

髮白解嘲

吳霜兩鬢早先秋  
聞道愁多會白頭  
溪上鷺鷥渾似雪  
想應無那一身愁

大禹祠

力平水土勢回天  
功業三千五百年  
四海九州皆禹蹟

獨留陵寢越山邊

青衣洞隱者

清泉自盥沐，  
髮不冠巾看盡世間事，  
爭如林下人嘯雲，  
崑谷應坐石，  
鹿麋親莫棄，  
茅菴去白桃花又春。

西湖所見

綠闌干護水鱗鱗，  
蘇小門前柳弄春，  
聽得語聲嬌不見，  
隔簾佯喚賣花人。

貞義女廟

貞女浣紗日行人去國悲生前漂母饋身後謫仙詞白  
月沈魂在黃金報德遲如何孟少府到此不題詩

題許山人居

葺茅栖碧巘梯路上雲危樹影池搖曲泉聲石礙遲鳥  
銜九罷藥猿拾著殘棋見說仙家伴時來覓紫芝

江東客中

詩人不是欠生涯野性從前嬾在家冷眼春來元有分  
看山看雪看梅花

秣陵晚眺

天塹鴻流擁積沙  
石城虎踞漫雄誇  
山陵青草六朝地  
巷陌烏衣百姓家  
紫蓋黃旗消王氣  
瓊枝璧月弔庭花  
孤雲更作降幡勢  
目斷樓船日又斜

田間見

破屋無茅柱脚斜  
一農頭白病看家  
年來水澇秧難蒔  
却傍湖塍種藕花

公子家

朱門黃道擁高槐拂曉鳴騶散乳鴉紅叱撥驕矜匝  
黑崑崙黯解琵琶姬將銀蠟燒明月犬帶金鈴卧落花  
不信銅駝荆棘裏百年前是五侯家

宮詞

月照芙蓉水殿秋仙韶一曲奏涼州高皇尚愛梨園舞  
宜索當年菊部頭

又

條脫金寒翠袖冰羊車夢裏輓轡聲薰爐宿得沈香火

暖却春纖調玉笙

姑蘇臺

妖艷分明構禍胎黃金瓌麗更危臺  
笙歌夜倚東風醉粉黛春從南國來  
原草翠迷行輦跡野花紅發舞衣灰  
豪華肯信今為沼煙水翻令後世哀

長卿

一病文園渴思深祇應惆悵為鳴琴  
老來減盡凌雲氣却賦長門易酒金



席上贈歌者

十足吳綾賞永新一聲歌歇店梁塵家徒四壁門如水  
那得明珠換美人

垂虹亭秋日遣興

滿袖玉皇香案煙絲霓背上俯晴川紅黃霜樹珊瑚海  
黑白雲花玳瑁天玄圃空離樓十二丹墀罷對字三千  
吟豪醉蘸吳江水寫與騎鯨李謫仙

阿房宮圖

千門萬戶盡青冥六國脂膏四海兵  
但此中非帝業當時猶更有儒坑

送牟都事景陽赴浙東帥幕

蜀郡方齊魯文翁邁雋賢箕裘承憲業  
星宿近台躔宇宙汾陽鼎風雲祖逖鞭  
閩威分海徼節制控閩川饋餉功曾立  
廉能蹟屢傳儒冠真耀武帥府重芳年  
參畫旌麾右馳驅將相前豪揮驚草檄  
燕集見華篇吏牘分占投軍機妙轉旋  
百蠻元震警諸校益貞堅訓練羣材進

鈞陶衆彥遷柳營兵鎮肅蓮幕紱光鮮除內恩終許安  
邊詔必憐酒容山簡醉騎想葛強聯日月新堯歷車書  
舊漢天揚雄兼賦頌嘉什到甘泉

驟網圖

劍閣清塵犯屬車網羸馱得荔枝無却嫌畫史才情少  
不作承平舞馬圖

初夏別業

別墅清深無俗人蛛絲牕戶網遊塵綠陰鏤日新歡夏

紅雨鑿花故惱春病去情懷逢酒惡困來天氣與茶親  
壁間烏帽長閒却肯學陶家戴漉巾

燕

銜得香泥去花間日午時玉人方睡起莫訝卷簾遲

謝僧遺石鎗

遠寄竒鎗紫玉形寒翁歡喜欲鐫銘茅峯道士傳茶訣  
林屋山人送水經崖瀑松風添瑟縮地鑪槐火共青熒  
矮瓶未罄長鑿健且傍雲根飽茯苓

荷錢

拾來虛費藕絲穿  
暴富池塘積萬千  
世不平如買得  
夏天那有蓋鷗眠

春日野步書田家

翳日橙雲翠幄遮  
葑圍高下奕枰斜  
陂塘幾曲深淺水  
桃李一溪紅白花  
頰尾自跳魚  
放子綠頭相並鴨  
眠沙  
春郊景物堪圖寫  
輸與煙樵雨牧家

客燕雨懷

都門飛雨布袍泥遊子魂銷幾夢歸賦有聲華羞狗監  
淚無氣槩笑牛衣客愁萬斛添杯量春瘦三分減帶圍  
不似江南煙艇小柳花如雪菽魚肥

寒食

十日花時九雨風年年百五病愁中春寒不禁香篝火  
紅蠟青煙憶漢宮

舊內臣家老馬

罷直奚官雪滿腮少年曾扈上之回金砧戍削蹄多裂

玉秣辛酸齒半摧  
首着地閒春草遍  
葡萄宮廢野花開  
病嘶破櫪秋風夜  
猶憶先朝較獵來

蠶婦

繅得新絲白將來  
織素縑自慙非錦綺  
尚被舞人嫌

端石硯

千年茁璞斬新硯  
一片琳腴截紫青  
雲漢帶星來玉匣  
墨池蒸雨出滄溟  
煙開霧斂天晶彩  
海靜江澄地典刑  
要與陶泓作佳傳  
老磨松液寫黃庭

東風

東風吹綠上汀洲  
染出江南一片愁  
長到春來問芳草  
不知何地可忘憂

無題效李商隱

粧淺顰深凭綺疏  
小郎新拜執金吾  
絃中言語分明怨  
裊上腰肢準擬扶  
翠履鴛寒慵鬪草  
紅牙馬暖罷擣菰  
無人商略心頭事  
潛向花間卜紫姑

早鄉田父言



疲牛病喘餓桑間碌碡閒  
眠麥地乾殘稅驅將兒子去  
豆畦却倩草人看

雙陸

金縷紋柔斲局堅紅雲倒浸一池蓮  
星環紫極無多點  
月印銀潢有兩絃  
行采砧聲鳴素練  
計籌花片落牙錢  
箇人慣受卑棲苦  
長為歸遲罰綺筵

秣陵寓居

荒園日日涉蓬蒿  
破屋年年蓋把茅  
向石側生花倚勢

緣牆直上豈攀高歸兮春草蕪三徑老矣松風有二毛  
莫笑家貧拙於事長鬚能壓榨頭糟

春病起即事

壯懷玉具劒空攜老去金門獻賦遲服藥身軀多病日  
養花天氣半陰時愁鄉塵積瑤琴嶽夢境寒生翠被池  
春事幾何公事急可憐蝴蝶掛蛛絲

孟能靜席上出四物分韻得牙背爬花字詩成贈  
天女纖纖罷散花嬰兒一掌玉藏瑕寒生鈎弋兩三指

春屈柔荑四五芽  
骸垢有瘡膚起粟  
臂風無力手長麻  
老夫技癢煩消遣  
休忤仙姑打蔡家

蘭

分向湘山伴野蒿  
偶并香草入離騷  
清名悔出羣芳上  
不入離騷更自高

許山人家

桐君種藥隱蘅臯  
竹祖生孫共養高  
茶脚碧雲凝午椀  
酒聲紅雨滴春槽  
休糧貌古添清瘦  
餌朮身輕長綠毛

仙詔未頒遲拔宅家資猶戀一溪桃

答無功歲暮見寄

豆稽灰動擁鑪天品字煨殘楮煙詩草病多刪枕上  
眼花書久廢燈前老依蕭寺僧留宿相對蒲團夜不眠  
筋力漸衰餘習在夢中去趣暗中船

書趙集賢詩翰後

九天宮闕鬱嵯峨公昔騎龍上大羅文在玉堂多煥爛  
洎經銅狄一滂沱原陵禾黍悲艷鎬人物風流繼永和

今日吳牋拜遺墨只堪哀怨不堪歌

兩宋名賢小集卷三百七十六